

佛說福力太子因緣經

宋西天三藏朝奉大夫試光祿卿傳法大師施護奉 詔譯



清刻龍藏佛說法變相圖

佛說福力太子因緣經卷上

中下
同卷

夙九

宋西天三藏朝奉大夫試光祿卿傳法大師施護奉詔譯

爾時世尊從本座起詣安陀林於一樹下晝
日棲止宴寂而坐是時諸苾芻衆於其園林
別會一舍依次而坐所謂尊者阿難尊者聞
二百億尊者阿泥樓駄尊者舍利子如是等
諸苾芻衆既共集會乃相謂言世間人衆何
所修作多獲義利尊者阿難言色相行業若
人修作多獲義利尊者聞二百億言精進行
業若人修作多獲義利尊者阿泥樓駄言工
巧行業若人修作多獲義利尊者舍利子言
智慧行業若人修作多獲義利如是說已咸
作念言我等今者言說差別不相齊等所謂
各各建立最勝若以此義往問世尊必爲我
等隨應宣說如其所說我等奉持何以故世

尊大師能斷疑故是大悲者譬如日光燭諸幽暗以一切智破諸疑惑解除苦網救度有情令歸正道等視有情猶如一子一切法中而得自在以一切法作大利益大牟尼尊能與一切息諸疑惑佛常勤爲解除疑結是故我等宜共往問時諸苾芻互言議已欲往見佛是時世尊在於林中以淨天耳過於人耳聞苾芻衆以如是事集會議論即從三摩地起詣苾芻所時諸苾芻前迎世尊設座奉請佛就座已告苾芻言諸苾芻向聞汝等共相議言世間人衆何所修作多獲義利初阿難言色相修作多獲義利聞二百億言精進修作多獲義利阿泥樓駄言工巧修作多獲義利舍利子言智慧修作多獲義利如是說已又起念言所說差別不相齊等所謂各各建

立最勝若以此義往問世尊佛必爲我隨意宣說如其所說我等奉持是事云何諸苾芻白佛言誠哉世尊我等向者爲以此緣集會議論願佛今時開決疑惑爾時世尊爲發此緣說伽陀曰

色相工巧與精進

風九

智慧於中爲最勝

若諸有情修福田 所獲福果又極勝

說是伽陀已復告苾芻言諸苾芻或時有人於色相等若隨修作非一切種一切時多獲義利若修福力於一切種及一切時多獲義利諸苾芻如福力者我不見有一法而諸有情隨修作已多獲義利何以故諸苾芻我念過去世時有王名曰眼力安止王城善布國政威神廣大安隱豐樂人民熾盛其王有后名曰廣照色相殊妙人所樂見彼廣照后後

於一時與王同會嬉戲娛樂由戲樂故誕生一子容止端嚴人所樂見殊妙過人具天色相而彼太子生生廣植妙色相因由彼具足殊妙色相是故今爲立名色力如是次第乃至其後別生三子彼第一者精進具足第二工巧具足第三智慧具足復次苾芻彼廣照后最後復有一子託陰是日忽然其王宮中種種珍寶自天而降復有微妙種種莊嚴珠寶露幔俱時出現覆王后上時眼力王見是希有殊特事已中心異之即召相師而詢問言今此希有殊特之相其故云何相師對曰大王當知王后有子託質聖胎其子大福具大威德當具名稱王聞語已復生驚歎乃至後時其廣照后忽起思念乃作是言大哉我今欲乘上妙師子之座覆以白蓋及須寶拂

即以此事具白於王王聞其言心生歡喜勅令周徧清淨嚴潔宮城內外如其所欲悉爲辦造又復一時彼廣照后忽起思念乃作是言我今往彼大金寶聚踞於其上隨意舉手自取金寶普爲一切廣行布施使匱乏者財寶豐盈以事聞王王隨所作又復一時彼廣照后忽起思念乃作是言快哉我今欲令釋放一切禁繫以事聞王王隨所欲勅令內外釋諸禁繫又復一時彼廣照后忽起思念乃作是言快哉我今欲遊園林以事聞王王隨所欲使淨園林令其觀賞又復一時彼廣照后忽起思念乃作是言快哉我今於此宮屬多人衆前以如是事發誠實語若我真實有福報者惟願天人速疾奉我殊妙莊嚴勝師子座我若得已處其座上廣爲人衆宣說法

要如是言已顯侯諸天降希有相以事聞王時眼力王即於宮中勅令周徧清淨嚴潔所有王城內外一切人衆悉著淨衣及妙嚴飾各持異香華鬘咸來集會時廣照后以衆嚴具殊妙嚴飾宮嬪眷屬侍從圍遶出詣衆前相好莊嚴其猶天女一切人衆咸所瞻仰俱生歡悅是時王后於諸有情隨起慈心仰瞻虛空以其真實加持力故說伽陀曰

天主人主及解脫 是三福力若最勝
由此真實我今時 願天速布師子座

風九說是伽陀已即時忽然天降勝妙師子之座及散妙華空中諸天悉皆喜悅時彼人衆見是希有殊特事已成生愛樂俱共歎異說伽陀曰

希有大福大力能 一切世間今供養

人間所欲天能成 彼天福力爲勝上

時廣照后心生歡喜處師子座昇是座已即時大地六種震動其師子座從地湧起住虛空中高七人量復有種種殊妙珍寶莊嚴露幔覆於座上彼諸人衆見是福力瑞相殊持生欣樂意各以所持異香華鬘供獻王后合掌肅恭以利益心居前而坐聽受其語時眼力王見是事已極大歡悅與諸官屬合掌肅恭依次而坐爾時廣照后即說伽陀曰

人當修作諸福因 如彼所作勿間斷

隨其樂欲施作時 由福藏故獲妙樂

風九說是伽陀已空中自然有聲讚言汝今善說最上善說又復空中奏天微妙可愛音樂其眼力王與諸人衆聞說伽陀時自然天降殊妙衣服及莊嚴具各墮其身王及人衆即以

所降衣服莊嚴前奉王后異口同音作是讚
言善說善說即時王后從師子座自空徐下
安處于地爾時天樂即隨停止復奏人間所
有音樂王及人衆咸生尊重廣供奉已悉皆
歡喜時廣照后迴入宮中既入宮已彼師子
座空中隨隱時諸人衆顯明觀見如上瑞相
歡喜讚言奇哉福力具大威德奇哉福力是
甘美果爾時廣照后處于宮中諸所思作皆
悉止息乃至其後滿足十月日初出時誕生
太子色相端嚴人所樂見即時大地六種震
動於其宮內空中自然雨七珍寶王城內外
徧一切處悉雨種種天妙衣服及雨最上悅
意妙華處處所有華樹果樹開敷結實觸處
布灑霏微甘雨四方徐起調適和風太子生
已安處于地即時四大天王以其威神忽然

地裂湧出上妙衆寶莊嚴勝師子座以奉太
子帝釋天主以天妙蓋及衆寶拂持覆其上
忉利天衆雨天妙衣及寶露幔又或雨其種
種珍寶或莊嚴具或妙衣飾或天妙華或復
末香塗香華鬘或天音樂出妙歌音毗首羯
磨天子以天神力王城內外除去一切荊棘
沙礫布以繒帛珠瓔莊嚴豎立微妙衆寶幢
幡徧灑清淨栴檀香水周布安置諸妙香瓶
散種種華乃至一切悅意施設復次有百大
象從曠野中自然來入王宮住於廐舍復有
百牛來于田里不以耕耘自然依時一切種
子具足成熟復次於其師子座下有五大藏
衆寶充盈顯開其門隨取給用終不能盡又
復爾時所有一切怨對有情於須臾間慈心
相向爾時太子以宿命力神通威德生已即

時觀察四方說伽陀曰

人當修作諸福因 如彼所作勿間斷
隨其樂欲施作時 由福藏故獲妙樂

是時空中別有一類天衆見此廣大神通威
德希有殊特福力事已皆生歡悅深心愛樂
爲其發起福威力故說伽陀曰

四大王天諸天子 忉利天宮天主等
彼諸福力極可愛 見此勝福復忻樂

時眼力王與其宮嬪侍衛眷屬耆舊臣佐等
顯觀如是吉祥勝相咸生歎異作如是言奇
哉太子有大福力奇哉太子具大名稱今人
中生乃有如是天中吉祥廣大勝相俱時出
現時王歡喜憐愛子故勅主藏者汝今應開
我之庫藏廣出一切所有金寶我當爲施所
有一類善祝願者使彼皆得財寶豐盈令其

爲我妙善稱讚廣作福事然復願我生生廣
集吉祥勝福當爲太子安立名字即時謂彼
諸臣佐言今此太子當立何名近臣白言大
王今此太子現生廣有吉祥福力勝相出現
是故宜應立名福力風九即時王勅福力爲名爾
時王以福力太子授其八母二母抱持二母
乳哺二母濯浣二母嬉戲令彼八母依時養
育乳哺濯浣及戲翫等乃至餘諸妙好樂具
一切供給受用豐足願速成長如淨蓮華處
於池沼其後太子漸成長已習學諸書隨學
即能窮究奧妙於刹帝利王種族中乃至一
切所應學者學悉通達而彼太子深信賢善
內心清淨一切所行自利利他具悲愍者於
法自在哀拯有情作諸布施無所積集一切
能捨大捨徧捨無有少分而不捨者謂若沙

門婆羅門貧窮孤露諸乞丐者或有來求自身血肉是時太子於乞丐人即起慈心觀如虛空乃作是念快哉我今令其乞者得滿所願隨即施與況復所有金銀珍寶飲食衣服塗香華鬘諸卧具等及餘所欲諸受用具願我一切應念出現得已施彼一切求者使令意願皆悉圓滿太子具是德故名稱徧滿於閻浮提下至龍界上徹梵天一切普聞

佛說福力太子因緣經卷上

佛說福力太子因緣經卷中

宋西天三藏朝奉大夫試光祿卿傳法大師施護奉詔譯

復次福力太子乃至後時與彼四兄出遊園苑而於中路有無數千針口餓鬼居山半腹容貌羸瘦其猶聚骨徧身熾燄鬼衆圍繞人所不見唯福力太子先覩其狀而彼餓鬼合掌居前白太子言汝大福德有大名稱是悲愍者我等飢渴苦惱所逼願今餉我少分飲食我等宿世造慳悋因故此生中墮餓鬼界無數千歲不得水飲況復於食而可見耶時福力太子仰瞻虛空即起悲念快哉我今若得天降少分飲食當用餉此諸餓鬼衆是時忽然有多飲食自天而降福力太子即以此食餉諸餓鬼彼餓鬼衆宿業力故悉不能見咸作是言太子我昔聞汝是悲愍者何故今

時不以飲食餉於我等太子告言我以天降飲食前授汝等云何于今不取食耶餓鬼白言太子我等宿業力故悉不能見時福力太子復起是念愍哉慳悋是不可愛乃作是言若諸福報有大力能以我如是真實語故令此餓鬼得見飲食一切隨應皆能取食發是言已彼諸餓鬼悉能見食即時各變面相如人福力太子心生歡喜遂以飲食恣其所取彼餓鬼衆既得食已頓止飢渴身力完具壯實充盛無醜惡形乃於福力太子各起清淨歡喜之意即時命終皆得生於兜率天上旋處空中白太子言太子我等得生兜率天上皆由汝之威神建立福力太子聞此妙善語已深大慶悅即時前進詣園林中與彼諸兄共會議言世間人衆何所修作多獲義利彼

色相具足者言今此世間色相行業若人修作多獲義利何故知耶謂若有人他昔未見見即歡喜昔未信重見已信重如我往昔師尊仙人亦作是說若有具足妙色相者爲人所喜妙色可觀瞻奉愛樂猶如智人樂最上法設諸供養復次精進具足者言非修色相多獲義利今此應知精進行業若人修作多獲義利何以故雖修色相而無精進豈能現世及他世中獲可意果或謂色相多獲義利者彼是愚人癡見所覆如我所說精進行業於現世中能成可意果者謂猶農夫植種商賈獲利仕者受祿學人通教修習禪定得輕安果皆爲現世精進所成諸可意果又此精進於他世中能成可意果者謂生善趣及生天界大富自在現證解脫皆爲他世精進所

成諸可意果由此一切功德皆以精進而爲依止又此精進能治怯弱若運精進無有少法而難成者復次工巧具足者言汝諸仁者雖復多種所說而實不能稱我心何以故所有精進若無工巧而終不能現有所成若復精進同工巧作乃能如實所作現成是故應知工巧行業若人修作多獲義利又復具工巧者若王若臣若沙門婆羅門諸長者等乃至下族中人及諸工巧之者悉來供獻復次智慧具足者言汝等當知人所修作多獲義利者且非色相亦非精進又非工巧何以故所觀色相若無智慧雖復相似而不淨妙所起精進若無智慧雖得義利而無有成所作工巧若無智慧雖復營修不能攝持是故應知智慧能成一切事業若人修作多獲義

利又此智慧能得色相能成工巧能發精進能獲人中一切妙樂爾時福力太子熙怡瞻視具智慧者而謂之言如是如是汝言真實所有色相工巧精進若無智慧不能多獲義利故知智慧普能攝持諸如實果仁者然此智慧若無福力諸有所作亦不得成是故實知若人修福多獲義利何以故福是純一果福爲光澤果福爲可意果福是適悅果如是福果我不能盡說其功德今爲汝等使開覺故於福門中說一少分汝等善聽由有福故能獲色相福具精進福得吉祥亦獲大富福具智慧福能歌詠正法功德福具聰利福遊正道福生上族福得宿念福具名稱福圓戒行福能布施福力常得諸根不壞福常快樂有福常受智者所供福完諸力福常會遇善

友知識福力能作一切事業謂若耕植田里或復商賈求利少施其功大獲積集富盛自在有福即能於思念間虛空自然雨其衣服飲食珍寶一切具足隨受快樂福獲可意妙好舍宅福於現世及於他生常得姝麗妻女眷屬及財穀等福者所行之地九自然無其荆棘沙礫住立平穩福者亦獲廣大身相若有患人福者手所觸時病隨輕差又復福者隨觸於人即能出彼飲食衣服珍寶財穀給用無盡福者常得天龍夜叉羅刹鬼等隨處衛護其猶雨時護苗稼神守護亦然福者常得多人尊重愛樂福有善譽福爲人讚福常能具諸善法分福者語言人所信順福者常得光澤可愛福者常出微妙梵音福者身肢自然柔軟福者常發妙善語言福者常值良友

智人不壞眷屬福者無病福者爲人所愛福
獲財利福者勇猛又大福者得爲人王無不
具足離諸疾病福者常得富盛不壞福者獲
得轉輪伏藏七寶具足福者能於虛空中行
福者威光與日月等福者得成月天福者得
成日天福者得成梵王福者得成帝釋福者
能於天宮樓閣中行如彼天子福者有大力
勢如阿脩羅王福者常生善趣福者捨離惡
趣福者常獲最極難得悅意妙華福者所作
成就福者能爲世間作諸照明福者常得天
人阿脩羅等正信供養太子說是諸福事時
四兄異見修作不同於是太子又復言曰我
今欲與諸兄潛適他國隨所住處證驗其事
爲當色相人多修耶或復精進工巧智慧福
力人多修耶是時四兄聞其言已悉隨所行

不復告白父王即適他國入一國已易其莊
飾各求棲止時色相具足者以妙色故人所
瞻觀皆生悅意隨獲富盛受用資養精進具
足者以勇力故能有所取而忽見一迅流大
河深廣可怖中有極大栴檀香樹彼精進者
取得其樹貨易獲利而成富盛受用資養工
巧具足者以工巧力隨作諸事由獲富盛受
用資養智慧具足者以巧智故能解勝怨復
能親附有財力者悅可其意令生歡喜隨獲
衣食及財寶等如所快樂受用資養爾時福
力太子隨自勝福大威德力周行施作利益
福事一日忽過貧人之舍乃入其中以彼太
子福威力故是舍忽有廣大吉祥勝相出現
金寶財穀周布充盈時彼貧人見已驚怪歡
喜思念此如是事昔所未有由何所起從何

所來豈非此人來我舍中是其威力之所致耶又念我昔極受貧苦今獲勝利一切豐盈必由是人來此所致使我舍中吉祥相現此人大福有大名稱宜應於彼尊重供養由是尊奉相續無間太子於其貧人舍中致諸富盛令快樂已乃至後時徧流聲譽其甲舍中昔甚貧匱有一異人來入其舍彼威力故是舍忽然吉祥相現諸人聞已於福力太子咸生信重俱共讚言奇哉勝福有大力能又以太子福威力故於彼方處華樹果樹開敷結實時令不愆徧灑甘雨種子生成而得滋茂時諸人衆於福力太子深生愛樂俱來瞻仰是時太子爲諸來者普攝其心故作是念快哉今時我此舍中可能獲得一切珍寶種種樂具及諸妙巧悅意等物給所來者使令具

足發是心時應念即現諸珍寶等皆悉豐盈時諸人衆驚異歎言奇哉大福爲甘美果乃於太子咸生尊重是時太子即爲諸人如其所應以四攝法平等攝持悉令和合所謂同一布施愛語利行同事由是名稱普聞一切國邑聚落乃至後時太子漸次到一國中見其國王治罰一人善醫業者勅彼獄官破其身肢斷截手足流血旣多楚毒苦惱是時被治罰人見太子已發大苦聲啼泣告言仁者救我仁者救我太子即時惻愴斯事乃自思惟我今作何方便救此人苦由是念間忽生智解如我所有施作福力世間現見作是念已悲心內激即破自身多出其血授彼令飲苦惱得除太子又見手足已斷甚大苦惱即取利刀斷已手足置於彼人手足斷處是時

太子觀察虛空普於一切有情隨起慈心即發廣大真實願言我於此生曾無少分不善之業若我所說爲真實者願令此人手足斷處即於今時支節相合平復如故發是言已彼人即時支節相合身體完具平復如故太子見已意願圓滿即作是念我以勤勇所作得成出自身血救此人苦斷自手足續其支節又以真實大誓願力使彼身命全復如故願我以此最上善根成就阿耨多羅三藐三菩提果當以法味授於彼人畢竟令住安樂涅槃發是願時一切大地六種震動帝釋天宮亦復震警爾時帝釋天主即自思惟此何事相而復觀察乃見福力太子作彼最上極難行事歡喜歎異又念今此大威德者作是難事何所求耶我今宜往證驗其故即變婆

羅門相自天而降住太子前告言太子我向見汝斷自手足何所爲耶太子答言仁者他有苦惱即我苦惱若他快樂即我快樂故我向者見一被治罰人甚大苦惱我時乃以真實力故棄捨自身手足支分填續其所斷割處願力真誠彼獲如故是時帝釋天主愈生歎異即復本形告太子言汝今豈非以不實心或異所求或退轉故捨自身耶太子白言天主我所棄捨自身手足無不實心亦無異求又非退轉帝釋復言汝若然者云何使我證知是事太子白言天主汝豈不聞如我所作皆真實力太子即於一切有情隨起慈心觀察四方以實願力說伽陀曰

若我所言是真實 貪愛自身爲纏縛
真實不退轉今時 願我此身即如故

說是伽陀已太子身肢即獲如故由是空中
徧雨天華奏天微妙可愛音樂和風徐起現
諸瑞相

佛說福力太子因緣經卷中

佛說福力太子因緣經卷下

宋西天三藏朝奉大夫試光祿卿傳法大師施護奉詔譯

爾時帝釋天主見是福力現生果報希有瑞相又知人天悉皆胥悅心頗異之乃謂福力太子言太子汝今如是勤修勝行有何所求太子白言天主我爲求證阿耨多羅三藐三菩提果拯拔一切有情出生死海悉令安住究竟涅槃時帝釋天主知福力太子勤求阿耨多羅三藐三菩提深心不動猶若須彌稱可其意作是讚言善哉善哉大士汝有廣大最上願力必當速證阿耨多羅三藐三菩提如是言已隱身不現復次於後彼國之王耆年而終其王未立灌頂太子於是王之宗族臣佐人民共會議言我等于今當令何人紹灌頂位時一人言若有福力大名稱者可宜

紹位如是言已衆意悉同即遣使人周行求訪是時福力太子當繼王位善根開發與諸侍從出遊園林太子行時道路平坦觸處皆無荆棘砂礫於其中路吉祥相現細雨散空旋布其頂異色飛鳥順次宛轉童男童女發勝妙聲踊躍奔馳咸生歡悅一切人衆身毛喜豎皆得輕安又聞空中悅意之言太子觀斯事相即起思念此相出現我當決定紹灌頂位作是念已進詣園中受諸福樂其園有一大無憂樹華開茂盛太子於彼安然寢寐凡九諸同往者樂華果故各於園中隨處遊賞又復太子福威力故彼有龍王忽然從地涌出千葉微妙蓮華其量廣大色香具足最上可愛而彼龍王又以神力徐置太子在蓮華上爾時太子都無動覺由是漸過食時日正中

分餘諸樹影悉皆移動唯無憂樹影覆太子身如故不動又彼園中諸餘華樹皆悉傾向大無憂樹吉祥勝相悅意可觀時福力太子夢見自身處穢污上又見自身穢污所染又見自以舌舐虛空又見自身蓮華中立又見自身上起山峯又見衆人頂禮於已太子寤已隨應占察如上所夢如我夢見自身在於穢污上者我必應居灌頂王位大富自在斯爲前相如我所見穢汚染身者我應處于大師子座如我所見上起山峯者我應於一切處常居最上如我所見衆人頂禮者我應爲彼衆所尊重如是等事審占其相我今決定爲灌頂王爾時彼國臣佐先遣使人周行求訪到彼園中具見太子次第相續吉祥勝相心生驚異此大福力有大名稱即時速還具

八九

十七

陳上事時諸臣佐聞彼言已皆生歡喜即依法儀悉備所須行詣園中授其灌頂到已見諸吉祥勝相時福力太子即於微妙大蓮華上結跏趺坐以福力開發故四大天王奉天莊嚴大師子座帝釋天主奉天妙蓋及衆寶拂忉利諸天奉種種寶嚴飾露幔散衆寶華如雲而下四大王天諸天子衆雨種種寶奏天微妙可愛音樂及散妙衣國中園林周徧清淨一切悉無荆棘砂礫豎立幢幡珠繒交絡設妙香瓶散諸異華與天宮等帝釋天主勅毗首羯磨天子普於園林悉令化出四寶所成廣大樓閣以備太子隨意受用時彼臣佐又觀如是希有勝相轉復異之咸各肅恭虔命太子處師子座頂禮尊奉如其法儀爲授灌頂太子得灌頂已身出光明周徧照耀

一由旬量映蔽日光而不顯現是時衆中有一類人見斯光已成悉稱言此勝光王一類人言此福力王爾時福力王將入王城帝釋天主等於其王前隨依法儀作供獻已隱復天宮時福力王既入城已善布國政人民熾盛安隱豐樂息諸鬭諍却除他敵悉無賊盜饑饉疾病愛護人民猶如一子華果樹林悉皆茂盛時令不愆稼穡豐阜雨澤順時大地受潤復次其後王之四兄聞斯異事咸生驚怪共會議言福力太子勝過我等福慧二全以福力故爲大國王最上大富稱可我心我等今時宜共往彼於是四兄同詣福力王所到已即時咸祝之言願汝最勝增長壽命又復讚言善哉大王汝昔要期今能固立福慧若斯勝過我等於他國中統王大位皆由汝

風九

十八

勝福力所成我等親朋具悉瞻覩時福力王從師子座歡喜而下致敬問訊如應施設高廣之座命彼諸兄次第而坐諸兄即令王復本座衆坐已定作諸供獻如先所論互談議已皆生決定歡喜之心時王起尊重意各以所奉如是集會過二三日王爲諸兄及彼人衆開發令知福非福事說伽陀曰

無福者墮地獄中	受大苦惱常無間
或墮餓鬼或畜生	受飢渴苦及負重
無福之者壞其身	無福爲奴重疲極
無福墮於鼂瘧中	無福愚鈍多邪慧
無福之者魑魅著	無福之者醜形容
無福多於下族生	無福心亂人所惡
無福之者多迷惑	無福爲他所輕謗
無福之者諸所爲	雖復勤力不成就

無福之者身羸羸澀 悉無威光不可意
無福之人凡所居 草木青潤成枯瘁
無福人所不隨順 外境觸害亦復然
諸惡鬼神羅刹娑 常時侵燒無福者
無福者用藥治病 返成非藥病增劇
由無福故受貧窮威九 復爲他人所輕慢十九
無福之人生子息 其性羸惡衆憎嫌
無福者雖眷屬多 常時離散生苦惱
無福者壞於眼目 而復相續諸苦生
多病皆由無福因 小生疾病固難差
無福之人多兇惡 無福常發羸惡聲
手指攣拳體不完 語言人多不信順
無福之人諸所有 王官水火盜賊銷
無福唯聞非愛言 觸處常生於驚怖
無福雖居平坦地 隨處旋當荆棘生

福者臨終受天樂 天宮樓閣現其前

忉利諸天夜摩天 彼彼天人來引接

兜率天宮諸天子 化樂天衆亦復然

他化自在欲界天 咸來衛護於福者

福者猶如大梵王 俱胝天衆皆宗奉

於其一千梵界中 凡九 廣大尊勝而自在

福者諸所作皆成 復常處於快樂位

一切皆生愛樂心 乃至外境無觸害

是時諸兄及其人衆聞伽陀已於福力王心

皆信伏極大歡喜現世他生顯明開示一向

悉知福力最勝時福力王爲諸人衆廣說福

事開發心已觀察虛空作是念言快哉我今

可能徧於王城內外悉雨種種珍寶衣服發

是心時忽有種種殊妙衣服及悅意華諸妙

珍寶自天而降悉皆充滿王城內外現是相

時人天胥悅咸生驚異悉起廣大淨信之心

俱發是言快哉天子有是福力具大威德復

次其後諸小國王聞是事已咸起思念彼王

有大福力具大名稱我今宜應往彼尊奉由

是諸王共會一處各領四兵所謂象馬車步

兵衆同詣福力王所下車前進肅恭伸拜合

掌白言天子大福具大名稱爲大國王威德

特尊我等今時故來親奉時福力王即復致

問普爲慰安如次坐已并其官屬各與無價

上妙珍寶又以十善法門普爲攝化是時諸

王俱獲勝利各還本國復次其後父眼力王 凡九

展轉聞知如是奇事先遣使人詣彼國已自

當速疾與諸官屬終日竟夜促途前進父王

到已愛念子故即時遙見雙目淚垂悲喜交

盈聲哀心切速從車下前執其手久而視之

父王乃言我是汝父汝必深知我今年耄衰
朽若斯國政甚難我不堪任今付於汝汝當
負荷言已即時卸自寶冠置於子頂子如父
教兼統其國

佛說福力太子因緣經卷下

音釋

顛魚容切 羸倫爲切 餉式亮切 愴楚亮切
顛仰也 羸瘦也 餉饋也 愴懷愴也
激石歷切 寤五故切 瘡倚下切 攀間綠切
激激切也 寤覺也 瘡不能言也 攀切手
拘擊切 悍侯肝切 耄莫報切
也 悍勇急也 耄九十曰耄